

Mei kite tahi ake
 I te rehunga mata,
 Tena ko tenei
 Ko Puanga tonu atu.
 Ai te marama
 E hora ki to taha
 Hei taunga mai
 Ma o tupuna.
 Nau mai, e hine,
 Taua ki konei,
 Kia waituhitia
 O mata rauwhero,
 Te urunga o te rau,
 Te moenga o te tini.
 Te noho atu koe
 I te aoturoa,
 I te ao pakakina,¹
 I te ao pakarea.²
 Ko te ao tena
 Hei wehinga mou;
 Ka moumou nei koe
 Ki te rua hounuku,
 Ki te rua whakapakaki:
 Te rokohanga ki au,
 E te tamaiti!

¹Ao pakakina: Ao marama, ao kanapanapa.

²Ao pakarea: Ao pouri.

194.—HE TANGI.

Na Pare-Hauraki.

(Waikato).

*Na Te Taite Te Tomo nga kupu, na Te Tahuna Herangi i
whakatikatika.*

E ki ana a Te Tahuna na Pare-Hauraki tenei tangi mo tana
kotiro. Ko Pare-Hauraki tetahi o nga wahine a Tawhiao.

(Taite: 35).

Takiri ko te ata,
 Ka rere ko te ra, e.
 E hine moeroa,
 Maranga mai ki runga, e;
 Toia atu ra
 Te tatau o te po, e;
 E ahu to tira
 Koe whare tu mai, e i,
 I raro o nga muri
 Kei o tupuna, e i.
 E mihi ana au
 Ki te kino kainga, e i,
 E hoa ma, e,
 I raro o Waikato.